



23 februar 2011

Inatsisartut Suleriaasianni § 37 naapertorlugu Naalakkersuisunut apeqquq imaattoq matumuuna saqqummiuppara:

Naalakkersuisunut apeqquq:

1. Suliniutit suut Naalakkersuisut aallartissallugit eqqarsaatigivaat innuttaasut avataanit tikisitanik orsukkaajusunik sukkukkaajusunillu neriunnaamisillugit kalaaliminernik neri-nerulersikkumallugit?

2. Suliniutit suut Naalakkersuisut aallartissallugit eqqarsaatigivaat innuttaasut timigissar-nerulersikkumallugit allatulluunniit ulluinnarni aalanerulersikkumallugit?

(Inatsisartunut ilaasortaq Niels Thomsen, Demokraatit)

Tunngavilersuut:

Rapportip 2005-2009-mut Kalaallit Nunaanni Innuttaasunik misissuisitsinerup uppersarpaa nunatsinni pualavallaartut amerlavallaartut. Rapportip pualavallaarneq marlunnik assigiinngitsunik periuseqarluni uuttortarpaa;

1. Body Mass Index – itut taasq (BMI) oqimaassuseq angissutsip marloriaataanut agguarlugu naatsorneqartartoq.
2. Qitip uuttorneratigut, pualavallaarnermut pitsaaneruseq naakkut orsoqarnermut uuttuutiginerarsinnaasoq.

BMI atorlugu naatsorsuinermit arnat 27 procentii angutillu 19 procentii pualavallaarujussuarput. Kisitsisit qaffasittorujussuupput ajorseriaannaarlutillu qitip uuttorneratigut. Periuseq tamanna malillugu arnat 57 procentii angutillu 25 procentii pualavallaarujussuarput. Kisitsisit tamarnik Nunarsuaq tamakkerlugu peqqinnissaq pillugu kattuffissuup WHO-p killiliusnaanut naleqqersuussaapput.

Pualavallaat amerlanerujussuisa kingunerissuaa siunissami Peqqinnissaqarfimmut nappaatit pualavallaarneq tunngavigalugit soorlu uummatikkut taqqatigullu nappaateqarneq, kræfti, sukkorneq



type 2, aap taqqanut naqitsinerata qaffasinnera aamma kolesterolip naqitsinera qaffasippallaartoq.

Demokraatit pingaarluinnatut isigaat inuiaqatigiittut maannagaaq iliuseqarnissarput paasillugulu qanoq pualavallaarnermut ajornartorsiutit annertusiartuinnartut pinaveersimatissinnaanerlugit. Uani isumaqarpugut nerisat aalanerlu pingaaruteqarluinnartuusut.

2005-2009-mut Kalaallit Nunaanni Innuttaasunik misisuisitsinerup takutippaa, 1993-mut sanillullugu sapaatip akunneranut minnerpaamik ataaseriaq nerisassanik avataaniit eqqussanik nerisartut amerlanerusut, ikinnerusullu kalaaliminitoqqanik minnerpaamik sapaatip akunneranut ataaseriaq nerisartut. Demokraatit isumaqarput nereriutsip allanngorsimanera pualavallaartullu amerlassusaat imminnut attuumassuteqarluinnartut. Taamaattumik kalaaliminernik nerinerunissaq eqqumaffigineqarnerusariaqarpoq.

Aamma taamatut 2005-2009-mut Kalaallit Nunaanni Innuttaasunik misisuisitsinerup takutippaa, inuiaqatigiit akornanni timip aalatittarnera 1993-mit annikillisimasoq. Tamanna ilaatigut peqquteqarpoq ataatsimut isigalugu aalaffiunngitsunik suliffeqarnerput. Taamaattumik Demokraatit isumaqarput pingaaruteqartoq timigissarnerulernissaq allatigulluunniit sunngiffimmi aalanerulernissaq eqqumaffigineqarnerusariaqartoq.

Ullut suliffiusut qulit iluanni apeqqutinnut akissutisinissara qilanaarivara.